

30/09/2016



**Z. Piro Xhixho**

Kryetar i Këshillit Drejtues

Autoriteti i Komunikimeve Elektronike dhe Postare

Tiranë

Referenca jonë: LRD/0108/IK

I nderuar Z. Xhixho,

**Përcillen komentet e Vodafone Albania në lidhje me këshillimin publik të dokumentit “Rregullore për monitorimin e spektrit të frekuencave.”**

Vodafone Albania u njoh me Dokumentin për këshillim publik “Rregullore për monitorimin e spektrit të frekuencave”, e së pari gjen rastin t’ju falenderojë për transparencën dhe punën profesionale të kryer për hartimin e kësaj Rregulloreje në kuadër të ngritjes së sistemit kombëtar të monitorimit të spektrit të frekuencave.

Në vijim ju paraqesim disa çështje lidhur me Projekt-Rregulloren objekt i këshillimit publik të cilat synojnë rritjen e qartësisë së saj dhe të efikasitetit të procesit, në përputhshmëri me kuadrin rregullator në fuqi:

1. Numrat e neneve në Projekt - Rregullore vërejmë se kanë nevojë për rishikim në mënyrë që të jenë sipas rendit numerik. Në vijim për lehtësi referimi, nenet janë sipas numrit dhe emërimit në projekt-Rregulloren e paraqitur për konsultim publik.
2. **Neni 10 “Detyrat kryesore të monitorimit”** – Me qëllim përmbushjen e qëllimit të kësaj Rregulloreje lidhur me krijimin e një mjedisi të përshtatshëm pa interferenca, si dhe mbrojtjen e së drejtës së operatorëve të autorizuar nga AKEP për përdorimin e spektrit të frekuencave pa interferenca të dëmshme, si dhe në përputhje me Rregulloren “Për administrimin e interferencave”, VA sugjeron që në nenin 10 të kësaj Rregulloreje të shtohet si detyrë kryesore e monitorimit edhe “identifikimi në mënyrë proaktive i interferencave dhe raportimi për marrjen e masave me qëllim eliminimin e tyre” dhe jo vetëm investigimi pasiv i rasteve të frekuencave të komunikuara paraprakisht nga subjektet e interesuara.
3. **Neni 11 “Plani i monitorimit”, pika 2** - VA sugjeron që me qëllim transparencën e procesit të monitorimit të kryer nga AKEP, të përcaktohen e publikohen në faqen e AKEP se cilat janë pikat kryesore të transmetimit në Republikën e Shqipërisë të cilat do të monitorohen nga AKEP gjatë një viti mbi bazën e planit vjetor të monitorimit, si dhe në çfarë mase do të monitorohet nga AKEP i gjithë territori i Republikës së Shqipërisë për garantimin ndër të tjera të përdorimit të rregullt e pa interferenca të frekuencave nga operatorët të cilët janë të autorizuar prej AKEP që të operojnë në të gjithë territorin e Shqipërisë.

4. **Neni 11 “Plani i monitorimit”, pika 2.a** – Në përputhje me komentin tonë të mësipërm, VA sugjeron që veprimtaria e monitorimit të përfshijë edhe “identifikimin dhe verifikimin e interferencave pavarësisht nga burimi i tyre, si dhe adresimin e tyre në përputhje me ‘Rregulloren për administrimin e interferencave’”.
5. **Neni 11 “Plani i monitorimit”, pika 3 dhe 4** – VA sugjeron që në Planin vjetor dhe mujor të punës, AKEP të marrë parasysh edhe nevojat e sugjerimet e sipërmarrësve për monitorimin e zonave të caktuara në territorin e Shqipërisë, me qëllim verifikimin, evidentimin dhe adresimin e problematikave lidhur me përdorimin e spektrit të frekuencave. Për këtë arsye sugjerojmë që AKEP të përcaktojë një afat brenda të cilit sipërmarrësit kanë të drejtë që të paraqesin kërkesat e tyre për monitorim në lidhje me planin vjetor të monitorimit, ose rast pas rasti AKEP të konsultohet me sipërmarrësit në lidhje me sugjerimet e tyre për planin mujor të monitorimit.
6. **Kapitulli III “Programi i veprimtarisë së monitorimit dhe raportimi”:** Me qëllim transparencën dhe efikasitetin në adresimin e problematikave të evidentuara në raportet e monitorimit, VA propozon që të përcaktohet duke u shtuar në këtë kapitull:
  - a. një proces për shqyrtimin e konkluzioneve dhe rekomandimeve të raportit të monitorimit dhe marrjen e veprimeve të mëtejshme. Ky proces duhet të parashikojë kompetencat dhe afatet e qarta për shqyrtimin e raportit të monitorimit, marrjen e vendimeve përkatëse për masa të mëtejshme ndaj sipërmarrësit/subjektit, adresimin dhe ndjekjen e problematikave lidhur me interferencat e evidentuara brenda afateve të përcaktuara, si dhe komunikimin e tyre së brendshmi dhe tek sipërmarrësit/subjekti/et e përfshirë;
  - b. detyrimin për njoftimin e sipërmarrësve lidhur me rezultatet e raportimeve që kanë të bëjnë me monitorimin e spektrit të frekuencave në përdorimin e tyre, me qëllim konfirmimin se spektri që AKEP i ka alokuar sipërmarrësit nuk përdoret nga subjekte të tjera në mënyrë të paautorizuar, si dhe nuk ka interferenca të dëmshme.
7. Me qëllim monitorimin, investigimin dhe adresimin e problematikave ende të pazgjidhura lidhur me interferencat e dëmshme të shkaktuara nga pajisjet për përdorim personal që operojnë në brezin 5MHz, VA propozon që në Kapitullin III të projekt-Rregullores të shtohet një nen ku përcaktohet procedura konkrete që do të ndiqet në përputhje me Rregulloren “Për administrimin e interferencave”, për monitorimin, evidentimin, investigimin dhe eliminimin e këtyre interferencave, të cilat pengojnë përdorimin e spektrit të frekuencave në përputhje me autorizimin individual.
8. **Kapitulli V “Kundravajtjet dhe masat administrative”** - VA sugjeron që të bëhet i qartë në këtë kapitull procesi i trajtimit të kundravajtjeve të evidentuara nga grupi i monitorimit dhe Këshilli Drejtues i AKEP në përputhje me parashikimet përkatëse kushtetuese, ligjore dhe nënligjore, kompetencat e AKEP dhe parimet e së drejtës. Në këtë kontekst sugjerojmë që në rastet e vërtetimit të kundravajtjeve administrative masat të jenë të përshkallëzuara duke filluar me sugjerimin e rekomandimeve dhe/ose masat e detyrueshme për zbatim brenda një afati të caktuar, përpara se të vendosen penalitete në rastet kur masat e tjera kanë dështuar të japin efektin e dëshiruar, apo kur kundravajtja është e përsëritur.



9. **Neni 18" Kundravajtjet", pika 2** – Me qëllim zbatimin e parimit të transparencës, sugjerojmë që në rastet e evidentimit të kundravajtjeve (përdorime të paligjshme të spektrit të frekuencave), grupi i monitorimit t'i vendosë në dispozicion sipërmarrësit dokumentacionin e plotë të ngjarjes si dhe raportin e matjeve, në rastet kur: a) kundravajtja mendohet se është shkaktuar nga vetë sipërmarrësi, b) kundravajtja ka të bëjë me një interferencë apo përdorim të paautorizuar të spektrit të frekuencave që i dhënë në përdorim sipërmarrësit.

Së fundi dëshirojmë të risjellim në vëmendjen tuaj problematikat ende të pazgjidhura dhe të kërkojmë ndërhyrjen tuaj e marrjen e masave konkrete për eliminimin e interferencave të dëmshme të shkaktuara nga pajisjet për përdorim personal, që operojnë në brezin 5MHz, të cilat na pengojnë në përdorimin e kanaleve në brezin 3G për të cilat VA është autorizuar e paguan rregullisht detyrimet për përdorim.

Duke ju falenderuar për mirëkuptimin dhe bashkëpunimin tuaj, shpresojmë se komentet dhe propozimet tona do të merren parasysh.

Me respekt,

  
Marios Giatzidis  
Drejtore i Departamentit Ligjor dhe Rregullator

